


乾
隆
大
藏
經



釋淨空敬題





龍

藏

大乘經
華嚴部

普爲出資及讀誦受持
輾轉流通者回向偈曰
願此功德 回向有情
消除業障 增崇福祉
家門清吉 身心安寧
生入聖域 沒往西方
先亡祖妣 歷劫怨親
俱蒙佛慈 獲本妙心
兵戈永息 禮讓興行
人民安樂 世界和平
四恩總報 三有齊資
法界眾生 同證菩提

This book is for free distribution. It is not for sale. Printed in Taiwan.

公元二〇〇七年八月出版 恭印貳仟套

乾隆大藏經

景印重編
句讀版本

倡印者：淨空法師

印贈者：香港佛陀教育協會

出版者：財團法人桃園縣至善教育事務基金會

地址：桃園縣中壢市過嶺里16之38號

電話：(〇三) 四二〇—七八〇九

傳真：(〇三) 四二〇—七八一三

淨空法師
影音網址
<http://www.budaedu.org.hk>

<http://www.amtb-aus.org>

<http://www.chinkung.org>

E-mail: amtbhkl@budaedu.org.hk

purelandcollege@iinet.net.au

承印者：世樺國際股份有限公司 (〇二) 二二四六九九二八

ISBN 978-986-83622-0-8

御製

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第十九冊目次

華嚴部

八四大方廣佛華嚴經八十卷

唐實叉難陀譯

卷第一、卷第六〇

永樂御製大方廣佛華嚴經序

大方廣佛華嚴經序

唐武則天製

(一)世主妙嚴品(卷一、五)

(二)如來現相品(卷六)

(三)普賢三昧品(卷七)

(四)世界成就品(卷七)

(五)華藏世界品(卷八、一〇)

(六)毗盧遮那品(卷一一)

(七)如來名號品(卷一二)

(八)四聖諦品(卷一二)

(九)光明覺品(卷一三)

(十)菩薩問明品(卷一三)

(十一)淨行品(卷一四)

一、九三七

一、二

三、四

五、七八

七九、九六

九七、一〇一

一〇一、一一四

一一五、一五五

一五六、一六六

一六七、一七三

一七三、一八〇

一八一、一九〇

一九〇、一九八

一九九、二〇五

(十二) 賢首品 (卷一四～一五)		二〇五	二三一
(十三) 升須彌山頂品 (卷一六)		二三二	二三三
(十四) 須彌頂上偈讚品 (卷一六)		二三三	二三九
(十五) 十住品 (卷一六)		二三九	二五一
(十六) 梵行品 (卷一七)		二五二	二五三
(十七) 初發心功德品 (卷一七)		二五三	二七一
(十八) 明法品 (卷一八)		二七二	二八三
(十九) 升夜摩天宮品 (卷一九)		二八四	二八五
(二十) 夜摩宮中偈讚品 (卷一九)		二八五	二九一
(二十一) 十行品 (卷一九～二〇)		二九一	三一六
(二十二) 十無盡藏品 (卷二一)		三一七	三二七
(二十三) 升兜率天宮品 (卷二二)		三二八	三四五
(二十四) 兜率宮中偈讚品 (卷二三)		三四六	三五三
(二十五) 十迴向品 (卷二三～三三)		三五三	五一二
(二十六) 十地品 (卷三四～三九)		五一三	六〇五
(二十七) 十定品 (卷四〇～四三)		六〇六	六六一
(二十八) 十通品 (卷四四)		六六二	六六九
(二十九) 十忍品 (卷四四)		六六九	六八一

(三十) 阿僧祇品(卷四五)		六八二	六九二
(三十一) 壽量品(卷四五)		六九二	六九三
(三十二) 諸菩薩住處品(卷四五)		六九三	六九五
(三十三) 佛不思議法品(卷四六~四七)		六九六	七二三
(三十四) 如來十身相海品(卷四八)		七二四	七三六
(三十五) 如來隨好光明功德品(卷四八)		七三六	七四一
(三十六) 普賢行品(卷四九)		七四二	七五一
(三十七) 如來出現品(卷五〇~五一)		七五二	八〇一
(三十八) 離世間品(卷五三~五九)		八〇二	九一六
(三十九) 入法界品(卷六〇)		九一七	九三七

永樂御製大方廣佛華嚴經序

拱一

蓋聞統萬法唯一理。貫萬古唯一心。心也者。萬法之源。衆妙之體。靈明不昧。清淨空寂。非色相之可求。非比量之可擬。故有無相之知。不用之用。惟不泥知故。無所不知。惟不泥用故。無所不用。所以森羅寶印。而周徧沙界也。大方廣佛華嚴經者。諸佛之性海。一真之法界。顯玄微之妙詮。演無盡之宗趣。語其廣大。則無所不包。語其精密。則無所不備。雖一路一門之可入。而千殊萬變之無窮。望之者。莫測其津。即之者。莫曉其際。所謂會滄海而爲墨。聚須彌而爲筆。不能盡一句之義。而況以淺近之觀。卑下之識。而欲探其閭奧者哉。雖然至道無形。至理有要。蓋要者。以一而爲衆。以衆而爲一。以大而爲小。以小而爲大。愈煩

而愈簡。愈多而愈約。含十方虛空於一毫。納無量刹土於芥子。行布萬象之衆明。圓融海波之一味。總貫于一。奚有差別事理交徹而兩忘。性相融通而無盡。若圓鏡之互照。猶明珠之相含。故悟之者。得圓至功於頃刻。見金色界於塵毛。普雨應量。隨其好樂。鮮不由於自心。亦何有於佛說。如彼世人。同遊寶藏。各隨所欲。皆獲如意。又如飢餐香積。皆得充飽。詮是理以闡教。其調伏利益者至矣。朕間窺真諦。略究旨歸。求千訓於一言。索群象於一字。深歎如來之道。甚深廣大。以一心而爲宗。啓多門而無礙。千流之異而同源。萬車之殊而同轍。最勝之法。真實之義。非名言之可窮。豈小機之可解。直須了悟自心。圓信成就。庶可叩真如之玄關。以造空王之寶殿也。於是

鏤梓徧布流通。廣大乘之教宗。爲群生之方便。若夫剖微塵之千卷。有待明人書大藏於空中俟。彼智者謹書此爲序以發其端云。

永樂十年六月初四日

大方廣佛華嚴經序

唐 武 則 天 製

蓋聞造化權輿之首。天道未分。龜龍繫象之初。人文始著。雖萬八千歲。同臨有截之區。七十二君。詎識無邊之義。由是人迷四忍。輪迴於六趣之中。家纏五蓋。沒溺於三塗之下。及夫鷲巖西峙。象駕東驅。慧日法王。超四大而高視。中天調御。越十地以居尊。包括鐵圍。延促沙劫。其爲體也。則不生不滅。其爲相也。則無去無來。念處正勤。三十七品。爲其行。慈悲喜捨。四無量法。運其心。方便之力難思。圓對之機多緒。混太空而爲量。豈筭數之能窮。入纖芥之微區。匪名言之可述。無得而稱者。其唯大覺歟。朕曩劫植因。叨承佛記。金仙降旨。大雲之偈先彰。玉宸披祥。寶雨之文後及。加

以積善餘慶。俯集微躬。遂得地平天成。河清海晏。殊禎絕瑞。旣日至而月書。貝葉靈文。亦時臻而歲洽。踰海越漠。獻琛之禮備焉。架險航深。重譯之詞罄矣。大方廣佛華嚴經者。斯乃諸佛之密藏。如來之性海。視之者莫識其指歸。挹之者罕測其涯際。有學無學。志絕窺覷。二乘三乘。寧希聽受。最勝種智。莊嚴之跡。旣隆。普賢文殊。願行之因斯滿。一句之內。包法界之無邊。一毫之中。置刹土而非隘。摩竭陀國。肇興妙會之緣。普光法堂。爰敷寂滅之理。緬惟奧義。譯在晉朝。時踰六代。年將四百。然圓一部之典。纔獲三萬餘言。唯啓半珠。未窺全寶。朕聞其梵本。先在于闐國中。遣使奉迎。近方至此。旣覩百千之妙頌。乃披十萬之正文。粵以證聖元年。歲次乙未。月旅姑洗。朔

維戊申。以其十四日辛酉。於大徧空寺。親受
筆削。敬譯斯經。遂得甘露流津。預夢庚申之
夕。膏雨灑潤。後輩壬戌之辰。式開實相之門。
還符一味之澤。以聖曆二年。歲次己亥。十月
壬午朔八日己丑。繕寫畢功。添性海之波瀾。
廓法界之疆域。大乘頓教。普被於無窮。方廣
真詮。遐該於有識。豈謂後五百歲。忽奉金口
之言。娑婆境中。俄啓珠函之祕。所冀闡揚沙
界。宣暢塵區。並兩曜而長懸。彌十方而求布。
一窺寶偈。慶溢心靈。三復幽宗。喜盈身意。雖
則無說無示。理符不二之門。然而因言顯言。
方闡大千之義。輒申鄙作。爰題序云。

大方廣佛華嚴經卷第一

唐于闐國三藏沙門實叉難陀譯

世主妙嚴品第一之一

如是我聞。一時佛在摩竭提國阿蘭若法菩提場中。始成正覺。其地堅固。金剛所成。上妙寶輪。及衆寶華。清淨摩尼。以爲嚴飾。諸色相海。無邊顯現。摩尼爲幢。常放光明。恒出妙音。衆寶羅網。妙香華纓。周布垂布。摩尼寶王。變現自在。雨無盡寶及衆妙華。分散於地。寶樹行列。枝葉光茂。佛神力故。令此道場一切莊嚴於中影現。其菩提樹高顯殊特。金剛爲身。瑠璃爲幹。衆雜妙寶以爲枝條。寶葉扶疎垂蔭如雲。寶華雜色。分枝布影。復以摩尼而爲其果。含暉發燄。與華間列。其樹周圍。咸放光明。於光明中。雨摩尼寶。摩尼寶內。有諸菩薩。

其衆如雲。俱時出現。又以如來威神力故。其菩提樹。恒出妙音。說種種法。無有盡極。如來所處宮殿樓閣。廣博嚴麗。充徧十方。衆色摩尼之所集成。種種寶華以爲莊校。諸莊嚴具。流光如雲。從宮殿間。萃影成幢。無邊菩薩。道場衆會。咸集其所。以能出現諸佛光明不思議音。摩尼寶王而爲其網。如來自在神通之力。所有境界皆從中出。一切衆生居處屋宅。皆於此中現其影像。又以諸佛神力所加。一念之間。悉包法界。其師子座高廣妙好。摩尼爲臺。蓮華爲網。清淨妙寶。以爲其輪。衆色雜華而作瓔珞。堂榭樓閣。階砌戶牖。凡諸物像。備體莊嚴。寶樹枝果。周迴間列。摩尼光雲。互相照耀。十方諸佛。化現珠王。一切菩薩。髻中妙寶。悉放光明而來瑩燭。復以諸佛威神所

持。演說如來廣大境界。妙音遐暢。無處不及。爾時世尊。處于此座。於一切法。成最正覺。智入三世。悉皆平等。其身充滿一切世間。其音普順十方國土。譬如虛空。具含衆像。於諸境界。無所分別。又如虛空。普徧一切。於諸國土。平等隨入。身恒徧坐一切道場。菩薩衆中。威光赫奕。如日輪出。照明世界。三世所行。衆福大海。悉已清淨。而恒示生諸佛國土。無邊色相。圓滿光明。徧周法界。等無差別。演一切法。如布大雲。一一毛端。悉能容受一切世界。而無障礙。各現無量神通之力。教化調伏一切衆生。身徧十方。而無來往。智入諸相。了法空寂。三世諸佛。所有神變。於光明中。靡不咸覩。一切佛土。不思議劫。所有莊嚴。悉令顯現。有十佛世界微塵數菩薩摩訶薩。所共圍繞。其

名曰普賢菩薩摩訶薩。普德最勝。燈光照菩薩摩訶薩。普光師子幢菩薩摩訶薩。普寶燄妙光菩薩摩訶薩。普音功德海幢菩薩摩訶薩。普智光照如來境菩薩摩訶薩。普寶髻華幢菩薩摩訶薩。普覺悅意聲菩薩摩訶薩。普清淨無盡福光菩薩摩訶薩。普光明相菩薩摩訶薩。海月光大明菩薩摩訶薩。雲音海光無垢藏菩薩摩訶薩。功德寶髻智生菩薩摩訶薩。功德自在王大光菩薩摩訶薩。善勇猛蓮華髻菩薩摩訶薩。普智雲日幢菩薩摩訶薩。大精進金剛齋菩薩摩訶薩。香燄光幢菩薩摩訶薩。大明德深美音菩薩摩訶薩。大福光智生菩薩摩訶薩。如是等而爲上首。有十佛世界微塵數。此諸菩薩。往昔皆與毗盧遮那如來。共集善根。修菩薩行。皆從如來善根

海生。諸波羅蜜。悉已圓滿。慧眼明徹。等觀三世。於諸三昧。具足清淨。辯才如海。廣大無盡。具佛功德。尊嚴可敬。知衆生根。如應化伏。入法界藏智。無差別證佛解脫。甚深廣大。能隨方便。入於一地。而以一切願海所持。恒與智俱盡未來際。了達諸佛希有廣大祕密之境。善知一切佛平等法。已踐如來普光明地。入於無量三昧海門。於一切處。皆隨現身。世法所行。悉同其事。總持廣大。集衆法海。辯才善巧。轉不退輪。一切如來功德大海。咸入其身。一切諸佛所在國土。皆隨願往。已曾供養一切諸佛。無邊際劫。歡喜無倦。一切如來得菩提處。常在其中。親近不捨。恒以所得普賢願海。令一切衆生智身具足。成就如是無量功德。復有佛世界微塵數執金剛神。所謂妙色

那羅延執金剛神。日輪速疾幢執金剛神。須彌華光執金剛神。清淨雲音執金剛神。諸根美妙執金剛神。可愛樂光明執金剛神。大樹雷音執金剛神。師子王光明執金剛神。密嚴勝目執金剛神。蓮華光摩尼髻執金剛神。如是等而爲上首。有佛世界微塵數。皆於往昔無量劫中。恒發大願。願常親近供養諸佛。隨願所行。已得圓滿到於彼岸。積集無邊清淨福業。於諸三昧所行之境。悉已明達。獲神通力。隨如來住。入不思議解脫境界。處於衆會。威光特達。隨諸衆生所應現身。而示調伏一切諸佛。化形所在。皆隨化往。一切如來所住之處。常勤守護。復有佛世界微塵數身衆神。所謂華髻莊嚴身衆神。光照十方身衆神。海音調伏身衆神。淨華嚴髻身衆神。無量威儀

身衆神。最上光嚴身衆神。淨光香雲身衆神。守護攝持身衆神。普現攝取身衆神。不動光明身衆神。如是等而爲上首。有佛世界微塵數。皆於往昔。成就大願供養承事一切諸佛。復有佛世界微塵數。足行神。所謂寶印手足行神。蓮華光足行神。清淨華髻足行神。攝諸善見足行神。妙寶星幢足行神。樂吐妙音足行神。栴檀樹光足行神。蓮華光明足行神。微妙光明足行神。積集妙華足行神。如是等而爲上首。有佛世界微塵數。皆於過去無量劫中。親近如來。隨逐不捨。復有佛世界微塵數道場神。所謂淨莊嚴幢道場神。須彌寶光道場神。雷音幢相道場神。雨華妙眼道場神。華纓光髻道場神。雨寶莊嚴道場神。勇猛香眼道場神。金剛彩雲道場神。蓮華光明道場神。

妙光照耀道場神。如是等而爲上首。有佛世界微塵數。皆於過去。值無量佛。成就願力。廣興供養。復有佛世界微塵數。主城神。所謂寶峯光耀主城神。妙嚴宮殿主城神。清淨喜寶主城神。離憂清淨主城神。華燈燄眼主城神。燄幢明現主城神。盛福光明主城神。清淨光明主城神。香髻莊嚴主城神。妙寶光明主城神。如是等而爲上首。有佛世界微塵數。皆於無量不思議劫。嚴淨如來所居宮殿。復有佛世界微塵數。主地神。所謂普德淨華主地神。堅福莊嚴主地神。妙華嚴樹主地神。普散衆寶主地神。淨目觀時主地神。妙色勝眼主地神。香毛發光主地神。悅意音聲主地神。妙華旋髻主地神。金剛嚴體主地神。如是等而爲上首。有佛世界微塵數。皆於往昔。發深重願。

願常親近諸佛如來。同修福業。復有無量主山神。所謂寶峯開華主山神。華林妙髻主山神。高幢普照主山神。離塵淨髻主山神。光照十方主山神。大力光明主山神。威光普勝主山神。微密光輪主山神。普眼現見主山神。金剛密眼主山神。如是等而爲上首。其數無量。皆於諸法。得清淨眼。復有不可思議數主林神。所謂布華如雲主林神。擢幹舒光主林神。生芽發曜主林神。吉祥淨葉主林神。垂布猷藏主林神。清淨光明主林神。可意雷音主林神。光香普徧主林神。妙光迴曜主林神。華果光味主林神。如是等而爲上首。不思議數。皆有無量可愛光明。復有無量主藥神。所謂吉祥主藥神。栴檀林主藥神。清淨光明主藥神。名稱普聞主藥神。毛孔光明主藥神。普治清

淨主藥神。大發吼聲主藥神。蔽日光幢主藥神。明見十方主藥神。益氣明目主藥神。如是等而爲上首。其數無量。性皆離垢。仁慈祐物。復有無量主稼神。所謂柔輭勝味主稼神。時華淨光主稼神。色力勇健主稼神。增長精氣主稼神。普生根果主稼神。妙嚴環髻主稼神。潤澤淨華主稼神。成就妙香主稼神。見者愛樂主稼神。離垢淨光主稼神。如是等而爲上首。其數無量。莫不皆得大喜成就。復有無量主河神。所謂普發迅流主河神。普潔泉澗主河神。離塵淨眼主河神。十方徧吼主河神。救護衆生主河神。無熱淨光主河神。普生歡喜主河神。廣德勝幢主河神。光照普世主河神。海德光明主河神。如是等而爲上首。有無量數。皆勤作意。利益衆生。復有無量主海神。所

謂出現寶光主海神。成金剛幢主海神。遠離塵垢主海神。普水宮殿主海神。吉祥寶月主海神。妙華龍髻主海神。普持光味主海神。寶焰華光主海神。金剛妙髻主海神。海潮雷音主海神。如是等而爲上首。其數無量。悉以如來功德大海。充滿其身。復有無量主水神。所謂普興雲幢主水神。海潮雲音主水神。妙色輪髻主水神。善巧漩澍主水神。離垢香積主水神。福橋光音主水神。知足自在主水神。淨喜善音主水神。普現威光主水神。吼音徧海主水神。如是等而爲上首。其數無量。常勤救護一切衆生。而爲利益。復有無數主火神。所謂普光焰藏主火神。普集光幢主火神。大光普照主火神。衆妙宮殿主火神。無盡光髻主火神。種種焰眼主火神。十方宮殿如須彌山

主火神。威光自在主火神。光明破暗主火神。雷音電光主火神。如是等而爲上首。不可稱數。皆能示現種種光明。令諸衆生熱惱除滅。復有無量主風神。所謂無礙光明主風神。普現勇業主風神。飄擊雲幢主風神。淨光莊嚴主風神。力能竭水主風神。大聲徧吼主風神。樹杪垂髻主風神。所行無礙主風神。種種宮殿主風神。大光普照主風神。如是等而爲上首。其數無量。皆勤散滅我慢之心。復有無量主空神。所謂淨光普照主空神。普游深廣主空神。生吉祥風主空神。離障安住主空神。廣步妙髻主空神。無礙光焰主空神。無礙勝力主空神。離垢光明主空神。深遠妙音主空神。光徧十方主空神。如是等而爲上首。其數無量。心皆離垢廣大明潔。復有無量主方神。所